

松江府

在南京西南領縣三

吳越春秋云吳子壽夢築葦亭於其國之東淞江之南以爲停留宿會之所後漢建安二十四年吳封陸遜爲葦亭侯本此然王象之引通鑑是年陸遜以平荊州功拜宜都太守封婁侯非葦亭也婁本秦縣屬會稽郡梁大同初分婁縣爲崑山而葦亭爲崑山地唐天寶十載吳郡太守趙居貞奏請割崑山之南境及嘉興海鹽三縣地立葦亭縣屬吳郡而葦亭之爲縣始於此僖宗入蜀爲羣盜王騰所據吳越錢鏐遣全武拔之遂爲吳越地晉天

福五年以嘉興縣爲秀州割華亭隸焉宋慶元元年秀州陞嘉興府而華亭屬嘉興元至元十四年以縣戶登二十三萬陞爲華亭府而華亭縣如故以屬之明年改名松江府取吳淞江而名然諱水爲災故淞字去水○府城不知起何年築按宋紹興二十五年酒務鑿土得唐燕胄妻朱氏墓記以咸通八年葬華亭縣城西脩竹鄉則唐時固已有城元世祖詔毀之至正末張士誠據吳乃復築周圍九里一百七十三步而開陸門四東披雲西谷陽南集仙北通波門各有樓樓外爲月城護城有池廣十丈亦有水門四是城也後殿九峰前襟黃浦大海環其東南三江繞乎西北蓋一都會云○城邑攷曰築耶城在郡城東三十五里晉左將軍袁崧所築又五十里爲前京城以地迫京浦故名○白苧城在城南五十里地生野苧俗名白苧漚○今城南有吳王獵場場有五茸因呼五茸城陸龜蒙吳中卽事詩五茸春草雉媒驕註云五茸者吳王獵所也後人以吳陸遜居此其子孫常所游獵因呼爲陸機茸○晉陸雲別宅在谷陽門內雲與荀隱初未相識嘗會張華許華謂今日勿爲常

談雲因抗手曰雲間陸士龍故昔稱葦亭爲雲間
今遞運所沿其名卽古之雲間館驛也段天祐寓
雲間驛書懷絕句城上啼鳥起夜闌瑣窗風度落
梅寒一年端正元宵月可惜匆匆客裏看○府治
北里仁坊內有雲間洞天宋叅政錢良臣所築有
東崑堂巫山十二峰諸勝見方岳錢府百詠詩元
時已廢而居民往往于其地得山石 我朝成化
間得數峰尤奇太守王衡輦置郡圃至今存○按
松江之名陸廣微引咸仲釋云松容也容裔之貌
江源連接太湖一江東南流五十里入小湖一江

東北三百六十里入于海一江西南流入震澤故
謂之三江口尚書三江旣入震澤底定是也晉張
翰仕齊王罔在京師見秋風起思松江鱸魚膾遂
命駕東歸俄而罔敗翰免于禍人皆服其知機○
唐宋之間夜渡吳松江懷古宿帆震澤口曉渡松
江瀆權發魚龍隊舟衝鴻雁羣寒潮頃覺滿暗浦
稍將分氣赤海生日光清湖起雲水鄉盡天衛嘆
息爲吳君白居易松江觀魚震澤平蕪岸松江落
華波在官常夢想爲客始經過水面排層網船頭
簇綺羅朝盤繪紅鯉夜燭舞青蛾鴈斷知風急湖

平見月多繁絲與促管不解和漁歌元僧惟則松
江觀閘歌吳淞江水急如箭昔有画圖今見面百
川應命爭見趨東注海門如赴戰海波怒發驅潮
頭戰退吳松水倒流江湖一日兩相闔萬古不決
如仇讎江水清兮潮水濁江水不似潮水惡惡潮
推出海中洲堆積江面成山丘官憂水害難疏鑿
橫江四閘同時作潮來下閘潮平開閘內不通潮
往回潮波怒息捲底去閘門又見江波怒閘上盤
渦萬陣分閘下狂瀾萬騎奔雷霆吼兮鉦鼓發石
走沙飛亂戈甲黃河衝破華山根健瀑擘開青
峽人言水性險而凶詎知水與人情同情濤識浪
怒且憤不在江湖在方寸水險尚可避人險終難
知人爭額額罔晝夜水爭尚有潮平時

華亭縣

附郭

新唐書天寶十載析嘉興置元和郡縣志云割崑
山嘉興海鹽三縣地置姑蘇志云長洲割地入華
亭今長洲亦鄰壤也寰宇記及通典並云因華亭
鎮以爲名或以縣有華亭鎮印遂謂白鎮爲縣不
知鎮者唐因隋制而置以掌捍衛守禦之事特縣
之冗職耳祥符圖經載鎮在縣西南二百步元豐

九域志始廢不書但相傳未置縣時市東名趙店今有神祠尚謂之趙店土地而縣前有石幢其地多湧泉云是海眼唐大中十三年立此鎮之則是縣置于玄宗時明矣○按華亭見吳越春秋已詳府沿革下劉孝標注世說曰華亭吳由拳縣郊外墅也有清泉茂林吳平後陸機兄弟共遊于此十餘年機後爲河北都督聞警角之聲謂孫丞曰聞此何如華亭霍啖乎○華亭尉廳有閣宋元豐初李綱父夔爲尉生公于閣下後爲中興名相人因呼爲相公閣○華亭縣學有達材龔紹興間鄭聞葉清臣同舍有題名後並叅政事縣尹以碧紗籠之稱爲盛事○志云九峰者郡之九山也天馬與余山二山爲最高曰玉屏次於二山曰崑山次於玉屏又次曰陸寶山曰機山曰秀林山曰鳳皇山曰橫雲山山各有峰故稱九峰□按崑山在城西北二十三里長谷之東晉陸氏之先塋此後機雲兄弟有辭學人以爲玉出崑岡因名之山形圓秀而潤傍無附麗望之如覆盎然蘇州以崑山名縣取此蓋梁分婁縣爲崑山時此山屬其境內故耳及崑山旣分華亭崑人遂以其境之馬鞍山稱崑

山松人以小崑自名胥失之矣元凌崑詩九峰西
 峙比崑崙晉代將軍墓尚存今日捫蘿登絕頂素
 丘麥壠自村村按凌崑字山英宋亡不仕放意于
 詩歌有唐大曆風格所著集曰古木風瓢行于世
 □橫雲山在崑山東北本名橫山天寶六年易今
 名或云以陸雲得名山巔有白龍洞潛通澱湖深
 不可測山中古塚纍纍世傳以為多晉陸氏所葬
 元至正二十四年有封姓者發一塚磚上有太元
 二年造五字按太元乃東晉武帝時逆數而上計
 九百十餘年矣塚中得古銅器二百餘內一水滴

長五寸高四寸作獅子昂首軒尾走躍狀一人
 部方大髭髯飄蕭騎獅子背左手握無底圓桶右
 手臂鷹腦心為竅以安吸子吸子微頂大正蓋腦
 心儼一席帽胡人衣褶及獅鷹毛羽種種備具通
 身青綠吸子渾若碧玉其製作非晉人所及知為
 漢器無疑或即陸氏所殉葬也凌崑詩云七峰崑
 峯擁層巒偃蓋孤松石上蟠行雨白龍何處去暮
 雲深鎖洞門寒□小橫山在橫雲東中限一水上
 多豐石及萬年松由絕頂至東北峰巒隱起壁立
 數仞色盡赭俗呼小赤壁斬然一罅若虎丘試劍

石前有石可踞而坐。下瞰小澗，故自幽絕。機山在橫雲後，南北相望。以陸士衡得名。山下有平原村，亦以機嘗爲平原內史。云前有陂澤，人家散布。汀岸隱然若畫。元錢惟善詩：烟逕雲林樹色昏。千尋喬木見名門。橫峰也有尚書墓，只酹平原內史魂。惟善字思復，錢塘人。有羅剎江賦，聞于時。後乃寓居華亭。□天馬山一名干山，在機山東，有水紆迴從橫雲來，經山際北流，曰天馬者，以形似名。曰干者，或傳干將鑄劍于此。舊圖經云：有干姓者居之。陸機草堂在于山。圓智寺石瞰溇湖，相傳士衡少日讀書于此。山頂有雙石魚，後爲風雨化去。其脅有泉，遊人掬以頰，面云能明目。凌嵩詩：八峰葱蒨石林幽，給事題詩紀勝遊。昨夜僧歸鍾鼓靜，一聲雀啖海天秋。□鍾賈山在干山之東，一水左限。沈涇塘山下有鍾賈二姓，故名。以其介在九峰之間，又名中賈山。其前爲廬山，亦以盧姓居之得名。□余山在廬山東北，舊傳有余姓者，脩道於此。吳興郡有余山，或遂指此爲東余。其上宜茶，有泉名洗心，甚清冽。唐乾元中建大明寺，宋大中祥符初改額普照寺。有陸將軍祠，世傳地本陸氏園亭，因

以祠之嘉禾記云晉陸機捨宅爲寺也宋有聰道人者太平興國二年結廬余山東峰有二虎爲之衛名曰大青小青行則隨侍有禪者見其梁間掛一書問知爲佛經又問嘗讀否曰如人看家書旣知之矣何必再讀天禧元年跌坐而逝相傳道人卒時二虎亦死瘞之塔傍踰年生銀杏樹二僧寮因闢亭其間以虎樹名□普照寺有慧辨和尚與蘇軾友善將順寂遺言須東坡至合龕四日坡至見其端坐如生頂尚溫遂作三絕哭之其一曰欲尋遺跡強沾裳本自無生可得亡今夜生公講堂

月滿庭依舊冷如霜□又有文照大師善鼓琴門戶絕交涼風佳月則操以供佛鄰貴慕之因隔墻作亭以聽師聞知卽徙常處寺有月軒聰道人所嘗翫月處自題詩云軒前轆轤轉冰盤軒裏詩成徹骨寒多少人來看明月誰知倒被月明看□玉屏山在余山東吳地記云曩薛道約居此亦名薛山山下有羅池產藕甚佳凌崑詩云五峰遙隔水村西薛老曾來隱翠微樵子唱歌牧子笛貪看明月夜忘歸□秀林山在廬山南本名神山唐天寶間易今名按梁簡文帝銘曰神山本名秀林山或

稱辰山在華亭西北二十餘里列九峰第四僻左
一方雖非巨麗未經標品而自古神仙往往託跡
實震旦之靈阜也余以機暇結駕游行覽茲佳勝
睠焉有懷乃作銘曰閣號天井山稱地維碧雞金
馬越瀆梁池懷靈蘊德孕寶含竒此亦仙岫英名
遠擢昔有鷲窟不燒淨土邁彼高蹤構茲法宇引
葉成帷卽樹爲柱石砌危橫崖階斜豎白巘途遠
丹源路深長林萬頃偉木千尋竹裡看博松間聽
琴捐芬蕩累散賞娛襟大通元年歲次庚午春三
月十五日題寫按志作細林山不知改自何年

而列九峰之四乃崑山非秀林也元彭素雲結茅
居此初素雲遍遊天下名山至武當山遇張真人
集雲水三千人於紫霄宮素雲執厨汲水苦行三
年得授棲神鍊氣之旨 國朝洪武十四年始至
此居焉二十七年八月旦起沐浴更衣趺坐而逝
七日顏色如生是歲十月上命中官來召以羽化
聞越月啓竈視之正身不倚錢溥細林八詠序略
云山有彭素翁仙塚有石洞雲出其中有溪潭澄
澈如鑑又有石井源深色瑩大旱不竭潭際漾沙
日光射之點點如金後人建崇真道院及晚香亭

凌嵒細林山詩四峰孤聳鬱蒼蒼新構僧廬傍野
塘林下雨晴春晝暖松花薰得白雲香錢溥題西
潭夜月詩寒月澄潭萬頃波涼風一曲羽衣歌畫
船美酒呼龍伯玉白長生壽素娥鷗鷺灘晴漁火
淡芙蓉洲冷露華多秋來直欲通宵飲白晝歡娛
有幾何□鳳皇山在府治北東枕通波塘西連玉
屏山據九峰之首延頸舒翼宛若鳳翥故名□陸
寶山界於鳳皇玉屏之間木陸氏家山也相傳山
藏金柱常現寶光故名山多土少石而土又膏美
人爭取之今夷爲平陸矣右已上卽九峰也

初楊基九峰行九峰山頭白雲飛飛來化爲游子
衣游子思鄉去不返青天漫漫白日晚恨恨天河
水夜夜東南流欲知何處去流向九峰頭九峰九
朶青芙蓉古今壘壘馬鬣封人生有身死有骨何
當函置白雲中○志云金山在府東南海中距府
治九十里平坡列坐二十人其北有寒穴樞要云
周康王東遊築城南接金山曰金山城去城十里
許當潮勢奔猛處有周公墩雲間志云華亭襟帶
江海上而齊晉近而吳越皆築城壘置戍此墩蓋
古人所築以防海者或因康王金山城而傳會以

周公墩耳吳國備史云孫皓常病有神降小黃門曰金山鹹塘風激重潮海水爲害非人力所能防吾乃漢之霍光可立廟塘側吾當統部屬以鎮之皓遂建廟於金山宋賜額顯忠每歲神誕日有魚名黑隘大者如山群引海族來朝亭午方退山北之海爲古海鹽縣後淪沒于海元末潮嚙山北岸下瞰橋井鑿鑿猶存有得一古碑曰鸚鵡洲界

國朝設金山衛於此築城周十二里西連乍浦東接青村南滙甯東北抵吳淞江控引幾三百里宋毛滂作寒穴泉銘序引景祐中相國舒王詠寒穴

詩云神震冽霜冰高穴與雲平空山渟千秋不出嗚咽聲山風吹更寒山月相與清北客不到此如何洗煩醒銘云泉之顯晦豈亦有數生此寒穴與世不遇美不見錄爲汲者惜泉獨知冽不計不食○志云薛澱湖一名澱山湖以其中有澱山也在府西北七十二里其源自長洲白蜆江經急水港而來周圍幾二百里實古鍾水之地北由趙屯浦東由大盈浦瀉于松江東南由爛路港以入三泖舊志云西有小湖又云縣西北有白蜆馬騰谷瑋瑁四湖且謂白蜆越在長洲馬騰谷瑋瑁三湖相

去僅五七里而澱湖茫然一壑不可復辨其後又載錡湖云有陸錡宅曰瑁湖曰邢湖曰新湖云皆在西北以今考之澱湖之南有瓢湖其傍有金銀東清東白西陳大葑諸蕩漾北卽蔓萊洲在長洲縣界涵浸相屬數十里其西過金澤又有西黿蕩雪落漾諸水而不得其名者尚多○澱山宋時在水心並湖以北中爲一澳曰山門溜山門溜之中又有斜路港大石浦小石浦通洩湖流後湖沙淤澱漸成田園元時湖去西北已五里餘今趙屯大盈去湖益遠顧由何家港及南北曹港受湖水以洩於江宋衛涇遊澱湖詩疎星殘月尚朦朧開入烟波一棹風始覺舟移楊柳岸直疑身在水晶宮烏鴉天際雲千點白鷺灘頭玉一叢欸乃數聲回首處西山渾在有無中元楊維禎詩半空樓閣澱山寺三匝帆檣湖口船蘆葉響時風似雨浪花平處水如天沽來村酒渾無味買得鱸魚不論錢明日垂虹橋下過與君停棹吊三賢○澱山今在平陸接機山之西北山形四出如鼇頂建浮圖下有龍洞云通太湖此山屹立湖中傍有小山初僅兩席許久之寢長寺僧築亭其上榜曰明極當時好

事者遂卽山中所有標爲十景曰鼇峰塔曰龍淵橋曰潛龍洞曰通靈泉註云橋在山陽洞在山陰泉在山巔宋慧燈禪師鑿石十六丈得此初名寒穴錢山人衮以名襲金山且其下有龍洞因易今名曰回經石相傳有僧往西域取經回過湖漂水墮此石上故名曰白蓮池在小山下與洞吞吐曰三姑祠在寺傍相傳爲秦人邢氏之女孟曰降聖仲曰月華季曰雲雀能役鬼工以治湖泖故祠之口一色軒寺舊東廡十八間皆粉素故名曰徹見閣在法堂後已上諸勝弁明極爲十今山在平田

去湖益遠不復如初元僧覺恩詩云三姑廟前春水生百婆橋畔曉烟橫誰家草屋映疎柳門外香芽初可烹荒陂斷岸無牛跡雨後閒行興何極什什伍伍何處郎行船打鼓春賽忙黃潛詩云移舟夜泊華亭縣忽聽吳歌思渺然最憶澱山湖北寺白雲堆裏看青天○趙屯浦在澱山湖北舊時直受湖水瀉於松江濶至五十丈通江五大浦之一也今自北曹港分支北流愈北愈隘浦口束以石梁僅通舟楫其接曹港處又名新河其一支東南流入曹港者曰南趙屯浦一支東北流入江者曰

北趙屯浦宋趙屯村人王可交棹舟入江忽見彩舫漾於中流有道士七人中有一呼可交者不覺舟近舫側一人呼之上舫一人令侍者傾酒飲之酒不出與二粟食之甘如飴命黃衣送上岸覓所乘舟不可得但覺風水林木之聲開眼而峰巒重疊乃在天台山瀑布寺前蓋是早離家爲三月三日僧言今九月九日已半年矣僧爲設食可交歎聞食氣自是辟穀挈妻子居四明山不復出○通江諸浦舊圖經以趙屯大盈顧會崧子盤龍爲五大浦五浦之中趙屯大盈皆直受澱山湖水趙屯迤西爲白鶴江大盈迤東爲青龍江昔人論湖水下流必由白鶴滙以達於江又謂由青龍江入海今白鶴青龍雖以江名僅同溝澮顧會盤龍從府城來絕橫塘入泖○大盈浦在澱山湖東迤東即青龍江圖經云昔孫權造青龍戰艦於此故名宋梅聖俞青龍江上觀潮詩百川倒蹙水欲立不久却迴如鼻吸老魚無守隨上下閣向滄洲空怨泣摧鱗伐肉走千艘骨節專車無大及幾年養就膏血軀一旦翻爲漁者給無情之水誰可憑將作尋常自輕入何時更看弄潮兒頭戴火盆來就濕○顧

會浦在大盈東其上源曰通波塘出府城北流爲五里塘又北爲祥澤塘遂別爲崧子浦北至鳳皇橋絕橫泖至斡山入上海○崧子浦自顧會浦分流下注舊江口按圖經崧子浦在縣東北五十里崧子塘在縣北十五里蓋北十五里者崧子浦南口自顧會分流處東北五十里者入江處也○崧宅塘又北流西折爲孔涇以孔子宅而名宋淳熙間居民浚河得一碑云天寶六年黃池縣令朱氏葬于崑山縣全吳鄉孔子宅西南今其地有夫子廟在慧日院側又院僧疏廟隄渠得寶玉六事璧

三環二簪一藏于縣庠皆舊物也○盤龍浦在崧子浦東其上流曰盤龍塘自府東三里北流絕俞塘遵朱坊橋入江長八十里其入江處曰盤龍匯其徑纔十許里而迂洄逾四十里如龍之蟠故名元末邑人錢袞隱居盤龍岡博學著書其種桑之所號曰綾錦墩元至順中有得喜禪師居盤龍塘喜每誦經輒有金甲白帽神人合掌立於其後以此人咸稱之爲喜菩薩不三年遂成勝利○三泖在府治西廣韻註泖華亭水也太史公云泖之爲言茂也吳郡志云泖在華亭境有上中下三名狹

者且八十丈祥符圖經谷泚在縣西三十五里周一頃三十九畝古泚在縣西四十里周四頃三十九畝今泚之界西北抵山涇南自泚橋出東南至廣陳又東至當湖又東至瀚海塘而止俗傳近山涇者爲上泚近泚橋者爲下泚縣圖以近山涇泚益圓曰圓泚近泚橋泚益濶曰大泚自泚橋而上縈繞百餘里曰長泚此三泚之異也或併胥顧謝家二泚爲三泚按二泚在縣東南一陂澤耳與三泚相望七十里其說非也陸機對晉武帝云三泚冬溫夏涼谷水在其北金澤章練小蒸大蒸白牛

諸塘在其西葑溇走馬諸塘在其東泚橋之外橫絕而東者秀州塘也吳天澤記云元符間老僧如海築基中泚作井亭施湯茗建塔標燈爲往來之望塔凡五層基廣一二畝遇漲不沒元楊維禎泛泚詩天環泚東水如雪十里竹西歌吹回蓮葉浦深香露捲桃花扇小彩雲開九朶芙蓉當面起一雙鷓鴣近人來老夫於此興不淺玉笛能吹鷓鴣濫堆按維禎字廉夫別號鍊崖先生會稽人老于松上○谷水一名谷泚一名華亭谷水極清冷吳地記云海鹽縣東北二百里長谷陸遜陸凱居此

陸機詩云髣髴谷水陽婉孌崑山陰寰宇記云華亭谷水下通松江酈善長水經註松江東南行七十里入小湖自湖東南出謂之谷水南接三泖卽此水也方輿勝覽云谷水出吳小湖經由拳故城下秦始皇時長水縣有童謠曰城門血當陷沒有老嫗信之旦旦往窺城門門侍問知乃密殺犬以血塗門嫗又往見血走去忽大水至淪陷爲谷因曰曰谷水長水卽由拳縣也按舊志或以縣南舊西湖爲谷水或以海鹽之蘆漈浦南入于浙江者爲谷水故道新志則以華亭谷爲長泖之異名卽

其所稱引如水經注則谷水與三泖接如吳地記則泖卽谷水如寰宇記則谷水卽華亭谷而圖經亦有谷泖之名以數說參之谷水原自有二縣南之谷水乃西湖之異名崑山山西之谷水則新志所謂長泖之異名而華亭谷蓋因陸氏封邑而言又谷水之異名舊以兩谷水混而爲一又折華亭谷與谷水爲二故多異同通志又以經由拳故城者爲谷泖道崑山西者爲華亭谷麗西湖上有谷水道院者爲谷水其說復異按俗傳泖中每風息雲開則衢甃井欄畢見蓋由拳故城也神異傳云由

奉陷爲谷水而城之故迹乃在泖中嘉禾志當湖
北有華亭河東北行三百里入松江與吳地記合
驗之地里皆三泖之疆界也但以谷爲河小異耳
此亦一水二名之證云○舊西湖在縣城西南隅
一水縈紆渟浸可百餘畝其上有西湖道院按舊
志西湖在府西南二里周圍三里晉爲陸氏養魚
池方輿勝覽云陸瑁池故一名瑁湖前志云西湖
卽谷水祥符圖經云谷水在縣南長一百五十步
中有五色泉相傳葛稚川煉丹湖上丹成投水中
後常湧泉作五色續志云湖有漩渦甚急小舟經
者或沈焉沒而出者舐所濡甘如飴謂其下甚深
寒若冰雪有橘商艤舟湖上得一丹置於舟次左
右則歌中則平過洞庭風雨躍去泉之東有唳鶴
灘鶴飲此水其聲乃清元陸鵬南晚涼湖上詩云
唳鶴灘頭水拍天養魚池上月籠煙眼前好景無
人管時有漁船泊柳邊○朱涇自秀州塘分支貫
市橋東流絕驅塘至蕩涇當市橋回折處日落照
灣唐船子和尚覆舟於此和尚名德誠初參藥山
儼禪師儼曰子以後上無片瓦下無錐地大闡吾
宗誠自離藥山乘小舟往來朱涇以綸釣舞棹隨

緣而度號船子和尚夾山善會禪師來參大契宗
旨及辭行回顧再四誠喚會回立起棹曰汝將謂
別有處耶乃自覆其舟入水而逝咸通十年卽其
處建寺誠有撥棹歌三十九首載機緣集○胥浦
塘在縣南四十里相傳伍子胥所鑿故名其水自
長泖接界而東梁大通六年築胥浦城于此續古
錄云宋胥浦鄉有女名喜姑嘗救活二燕雛於蛇
螫明年女卒春燕來周章哀鳴家人告以女墓所
在燕卽飛往死於墓前時惟正禪師寓普照寺爲
作雙燕碑留寺中按惟正邑人常跨黃牛時人目

爲正黃牛皇祐元年四月佛日忽語衆云動以對
靜未始有極吾一動六十四年今靜矣然動靜本
何有哉語畢而瞑○柘湖在縣南六十五里吳地
記云周圍五千一百一十九頃中有小山生柘樹
故湖山皆以柘名吳越春秋秦海鹽縣淪沒爲柘
湖移於武源復陷爲當湖晉隆安五年孫恩北出
海鹽宋武帝築城於故海鹽恩知不可下進攻滬
瀆則晉嘗築城於此矣錢氏有國浚柘湖及新涇
塘由小官浦入海後漸湮塞僅餘積水若陂澤以
今視之凡查山之西北張堰之東南黃茅白葦之

場皆其地也○秦山在張堰鎮西俗呼秦望山謂
始皇嘗登此望海故名山之陽有仙人洞外僅容
趾內轉深黑嘗有秉燧入者行漸寬廣未及半燧
窮而返其巔生異草取藏箝中久而沐以湯鮮翠
如生因名長生草有坑產白堊以音與惡同因名
白善○查山在張堰南東去秦山十餘里舊名遮
山錢袞定為查按集仙外傳云查玉成鍊丹海上
小山中今山臨海上有浴丹井而鄉名亦曰仙山
其當為查無疑○小蒸鎮在縣西九十里其西十
里有漢濮陽王墓高大而不生螻蟻相傳築墓時

以酒醋灑土涉梅蒸而堅故名大蒸又有小墓名
小蒸地挹九峰三泖之勝因美其名曰貞谿明邵
亨貞貞谿初夏詩六首雨後林深竹笋肥渡頭風
急柳花飛柴門不掩綠陰靜人在閒窓試苧衣又
綠陰桑柘滿高原白水蕪葭接遠村江上人家無
俗事輕舟載網過柴門又巡簷燕子掠晴絲隔塢
茶烟出院遲草色入簾人不到午風吹暖夢回時
又春水初收露淺沙野人相見問年華芒屨竹杖
前村路煙樹深深叫亂鴉又棟花風起漾微波野
渡舟輕客自過沙上兒童臨水立戲將萍葉飼黃

鵝又巷巷線車葉蘭熟村村社鼓野神來鵝鳩聲
 在樹陰裏花下柴扉晝不開○舊圖經云三女岡
 在縣東南吳王葬三女于此吳越春秋有吳王葬
 女閭門外事吳郡圖經閭門外有女墳湖樞要云
 吳王葬妃於此未知孰是明行寺記云寺近三女
 岡則岡當在今南橋鎮是○秦始皇馳道在縣西
 北崑山南四里相傳有大壩路西通吳城即馳道
 也輿地志云始皇東遊至會稽句章經此漢賈山
 至言秦皇馳道遍天下東窮燕齊南極吳楚此蓋
 其一也按姑蘇志崑山縣南四里有古浦塘在華

亭西北然則馳道即塘岸耳山北又有秦皇走馬
 塘○顧林亭在縣東南三十六里地有高丘梁黃
 門侍郎顧野王居焉其北有湖湖南有林因名顧
 亭湖及顧亭林其高丘名野王讀書堆石晉天福
 五年遷市西北法雲寺於此後改額寶雲元年獻
 譔重脩寺記趙子昂書碑云寺之徒二人同夢金
 紫一偉丈夫云是梁朝侍郎若有所屬明夕二人
 又同夢且告以古碑所在晨起尋舊寺果見片石
 水次引繩出之已殘缺有十四字曰寺南高基顧
 野王曾於此修輿地志衆始駭愕乃即寺東偏立

祠奉之宋邑人戚氏子可觀祝髮於寺受具足戒
乾道七年丞相魏杞出鎮姑蘇請主北禪入院適
值重九師上座云胸中一寸灰已冷頭上千莖雪
未消老步只宜平地去不知何事又登高魏公擊
節不已元成廷珪題顧侍郎祠詩云寶雲寺裏舊
祠堂自吸清泉酌野王白馬有神嘶古道紫衣無
夢到禪床塵銷壞壁書千卷土蝕殘碑字幾行欲
借玉篇遺稿看山僧無語立斜陽○東菴在亭林
中有忠烈公像菴地常裂數尺許中間風濤之聲
以物探之則應手火起○烽樓在亭林南按法雲

寺記載唐隰州司倉支令問妻曹氏墓志云葬顧
亭林南烽樓之側其南岡阜相屬世傳爲野王墓
非也寰宇記云南帶海上有烽火樓基吳時望海
處○黃耳塚在城南二里餘俗呼爲黃泥蕩宋慶
元六年尼如湛建普寧寺於其傍述異記云陸機
少好獵在吳日有快犬曰黃耳後仕洛携以自隨
機嘗戲語犬曰家久無書汝能馳往否犬搖尾作
聲似應之機爲書盛以竹筒繫犬頸犬走向吳經
水輒依渡者掉尾向之得渡則騰上速去到家得
書還馳向洛後犬死還葬其家村南二百步呼爲

黃耳塚商芸小說云後分華亭南爲黃耳村以犬塚爲號獨劉貢父詩話以黃耳爲僕名未知何據○伽藍志云法忍寺在朱涇鎮唐咸通十年建其地乃船子和尚覆舟處詳見前朱涇記寺有魯般殿相傳是般所造齊柱累枅爲脊鳥雀不棲殿庭雙栢古怪亦云般所植病心者掇其皮服之皆愈有松澤西亭船子和尚維舟詠歌處後爲西亭蘭若寺基本釣灘船子和尚垂綸之地其詩云千尺絲綸直下垂一波纔動萬波隨夜靜水寒魚不餌滿船空載月明歸○北禪寺在府東北城內覺岸稽古錄云馬嗜法寧禪師以宋紹興間自馬嗜出航海至華亭先一日有章衮之母高氏夢師至遂迎止錢氏園其夜園中有光掘得碑云大唐禪寺又得銅金剛天王像因建此寺乾道中建北道堂於北禪寺傍有回先生過之手植樟樹一本於雲堂後數年復來問章公何在無有知者時樟樹已枯瘁回見之而笑取瓢中藥一丸瘞於根下人亦不以屑意一夕乍熱多蚊回畫一瓢於雲堂壁間蚊悉棲其內衆方異之忽然不知所往爾後樟樹復榮每葉皆有瓢痕始悟爲呂洞賓宋宗室趙孟

僞者當德祐元年文天祥辟爲從事至吳僅五十日而大事已去元授孟僞吳江尹逃去爲道士名道淵居五年爲僧名順昌自號三教遺逸改堂名書一菴所著有湖山汗漫集○超果寺在府西南瑁湖橋右本名長壽初邑人朱氏子心鑑藏魚禪師入靈默大師室大中十二年洛下脩長壽寺勅與居焉咸通十五年歸鄉建寺亦名長壽宋太平興國中僧慶依奉大士像艤舟李塔滙像留瑞光如虹下貫寺西廡之井中因名瑞光井熙寧中靈照禪師於寺開淨土會道俗恒二萬人又有惟湛

禪師大揚天台宗旨於此○南禪寺在儒學東元翰林承旨闔復記畧云唐元和間船子和尚過此地合掌曰形勢最勝願來興福至宋崇寧中有張頭陀者廬於其地掘井得羅漢像十有六遂爲施水菴後頭陀以掩骼不受賞換牒爲僧名普願請菴額於朝賜今名元有覺岸寶洲禪師講楞嚴大義于寺講至七徵心忽淨竝水騰躍注於其懷坐者驚愕師笑曰此偶然耳○興聖寺在城東南穀市橋漢乾祐二年建寺東水陸池有龜數枚每聞講則緣砌而上講罷復去日以爲常池南有塔九

層元時西有普照塔又西有延恩塔西南有超果塔東南則此塔謂之四塔是時有夏監運家在四塔之東而小室內有一塔影長五寸許倒懸於西壁上後或見於城西南黃泥淩中至正十年寺鑄銅鐘有老嫗以雙股銀釵投液鐘成見於鐘腹捫之隱然又有金指環在蒲牢側○願浩寺在澱湖之金澤去城七十里宋末邑人李智遠居寺中竟日閉關澄心默坐元兵至衆皆逃遁智遠若無聞兵擒之不驚縱之亦不喜事定月餘忽沐浴冠裳歛身危坐書偈云四十三年處世中夢成夢覺又成空今朝撒手還歸去木馬頻嘶物外風書畢而逝○東禪寺舊桃花菴也宋時蜀僧姓空名普結廬其地環廬植桃後爲寺以在府東故稱東禪普雅好吹鐵笛稱鐵笛禪師一日忽語人曰坐脫立亡不若水葬一省柴燒二免開壙撒手便行不妨快暢誰是知音船子和尚高風難繼百千年一曲漁歌少人唱遂乘木盆於青龍江上張布帆吹笛泛泛而沒○松隱菴在城南二十七里元至正間邑人張氏子德然生具異相左足下有一痣口能容拳舌能舐鼻七歲誦華嚴經於杭州天龍寺後

叅石屋和尚謂其緣在吳松爲書松隱二字來此
結菴扁曰松隱足不越閩者三年嘗剗指血書華
嚴經八十一卷洪武二十一年沐浴辭衆而逝○
葉菴在俞塘北宋淳熙間郭樞密子爲其女兒建
女兒適葉氏早寡誓節爲尼居此因名葉菴嘉定
間請于朝賜尼名正覺覺能詩其徒石刻一絕以
銀寘之豎於塔前覺詩云春朝湖上風兼雨世事
如花落又開退省閉門真樂處閒雲終日去還來
○輟畊錄云元周待制仁榮買地于府城之鄭梘
兒坊翔義塾以淑後進築礎時掘地深纔數尺有
青石護雙硯硯有款識乃唐鄭司戶虔故物塾旣
成遂名雙研堂虔字弱齊俗訛爲梘兒云○南村
又云周本心先生卽待制公之字也公築一室纔
落成友人楊公道輿疾至門曰願假君新宅以死
先生讓正寢居之妻子有難色先生弗顧未幾楊
死箱財二十有八莫適王者楊之弟詣求分財先
生日若兄寄死于我意固在是喪事之費悉自己
出終不利其一毫對衆封籍自平陽呼其子來悉
付與之

上海縣

在府東北
九十里

初華亭有地曰華亭海居海之上洋人烟浩穰商
舶輻輳遂成大市宋卽其地立市舶提舉司及權
貨場曰上海鎮元至元二十九年知府僕散翰文
議割華亭之長人高昌北亭新江海隅六鄉爲縣
名曰上海按永樂大典載邲亶水利考謂松江南
有大浦十八中有上海下海二浦今縣治之左有
大川曰黃浦亦曰上海浦縣之得名以此或云宋
初諸番市舶直達青龍江鎮後江流漸隘市舶在
今縣治處登岸故稱上海○縣治卽舊市舶司南
瞰黃浦北枕吳淞大海東環九峰西拱廣原沃壤
盡境皆然○縣初未有城嘉靖十九年崇明寇秦
璠據南沙以叛勢甚倡蹶縣無城邑室皆遷避三
十一年有倭舶飄至寶山吳淞所百戶馮舉宗元
爵率所部擒之反被殺賊遂沿途南入縣境擄漁
船遁去於是知我無備寇無寧歲三十二年四月
十五日倭復自海口入北海頭登岸五月初七日
擁衆數千從太平寺奄至縱火焚廬舍及縣署滿
載而歸於是知府方廉始議築城數月間幸賊不
至城成周圍凡九里濠廣六丈周廻縈繞外通潮
汝明顧或竹枝詞七首太湖東來滄海西四十二

灣江漸低源頭受得浙間水不放渾潮淤作泥 又

汀流兩岸盡平川薺麥如雲樹若烟不是青龍任

水監陸成溝壑水成田 又沙田疲瘠快秋登家計

渾如水上冰今日新僉河泊戶阿儂准備學攀疊

又平川多種木棉花織布人家罷緝麻昨日官租

科正急街頭多賣木棉紗 又黃浦西邊黃渡東張

涇正與泗涇通航船昨夜春潮漲百里華亭半日

風 又大浦橫塘九里灣蚤潮船上晚潮還儂心恰

似東流水直到海門無日間 又滬濱祠荒古壘平

東西蘆浦荻芽生袁崧向時防海處何物孫恩敢

弄兵○志云斡山在府治鳳凰山之北顧會浦之

東縣界西南起此嘉禾志作竹斡俗呼北斡因于

山在南又訛為北于舊經上宜美箭故名山有玉

竇泉甚寒冽有雨華洞宋張頭陀隱居於此元有

竒隱生名瑾不知其姓山下人也幼時嘗夢掘地

得大小墨數百笏遂善屬文長好遊名山至正間

自具區道毗陵渡江抵淮泗以直言于在位者不

用還而讀書山中著史補斷丹崖夜嘯金聲錄玉

露吟各若干卷一室晏如或勸之仕答曰大丈夫

仕當為天下除殘剗暴否則不如抱膝坐耳乃終

其身○福泉山在斡山北下皆黃土初因其形名
覆船山後以井泉甘美易今名又北爲駱駝墩亦
以形似而名又稱落彈墩○大海在縣東七十里
北起嘉定南抵華亭爲縣所轄松江與黃浦合流
入馬混茫無際東接諸番而日本最近宋元間入
貢皆由青龍市舶司後漸徙於四明貢者不復取
道沿海皆淺灘不逮閩浙百一俗號窮海獨鹽利
爲饒自清水灣以南較川沙以北水鹹宜鹽故舊
置鹽場近有沙堤壅隔其外水味寢淡溷薄難就
而煮海之利微矣先時潮汐從吳淞口入朔望以

子午爲信萬曆八年潮決李家洪去故道南二十
里許潮汐遂蚤數畧唐周繇望海詩滄茫空泛月
四顧絕人烟半度中華岸傍通異域船島間疑有
邑波外恐無天欲作乘槎客翻然去隔年明殷弼
前題吳淞江口海門東萬里京師咫尺通白柁紅
旗三月浪紫簫花鼓午潮風○吳淞江在縣北其
源出太湖東注於海已詳華亭吳江下自吳江長
橋東流至長洲尹山北流至甫里東北流又過華
亭澱山乃入縣境在宋盛時相繼修鑿然潮汐易
壅國初僅通舟楫而已隆慶二年巡撫都御史

海瑞力議開濬自縣境屬于崑山略灣取直江流湍駛雖未盡復故道而二十年灌莽之區漸成沃壤矣唐杜牧松江詩清露白雲明月天與君齊棹木蘭船風波湖雨一相失夜泊橫塘心渺然陸龜蒙前題柳下江餐待好風暫時還得狎漁翁一生無事煙波足惟有沙邊水勃公○宋紹聖間松江有漁翁不知何許人恒擢舟往來江上意氣自得醉則扣舷而歌閩人潘裕遇彼異之揖而問曰吾視先生固非漁釣之徒願求緒言以啓蒙陋翁曰吾厭喧囂遜迹於茲三十年矣幼喜經史百家之言

言後觀釋氏書今皆棄去惟飽食以嬉尚何所事裕曰先生澡身浴德如此今聖明在上盍出而仕乎翁曰君子之道或出或處吾雖不能追園綺之蹤竊慕老氏曲全之義且養志者忘形養心者忘道致道者忘心心形俱忘其視軒冕如糞土耳與子出處異趣子其勉之裕曰幸聞先生之高義敢問舍所翁曰吾姓名且不欲人知况居室耶遂鼓枻而去又有賈宣伯者嘗過松江適潭有孽怪宣伯以數刀圭藥投潭中明日老蛟死浮於水而水蟲不知其數此藥云受之閣阜山王天師○滬瀆

江在縣北一十里吳郡記曰松江東瀉海曰扈海亦謂之滬瀆滬水名也凡水發源而注海曰瀆陸龜蒙云列行於海滬曰滬瀆是也晉史虞潭為吳國內史修滬瀆壘以防海寇通鑑晉隆安二年吳國內史袁崧築滬瀆以防孫恩後竟死於是寰宇記云袁崧城在滬瀆江上舊有東西二城其傍為蘆子渡俗呼蘆子城東城廣萬餘步有四門元時徙於江中餘西南一角西城極小在東城西北兩傍有東西蘆浦永樂大典云江側有扈瀆壘今考其地淞江水直趨而東又七十餘里入海無復有

瀆兩岸皆平疇茂林故壘寂然其東西蘆浦亦止通潮汐而已豈陵谷變遷古今異勢耶元貢師泰詩避難吳淞江出遊滬瀆壘世道苦變更形勢總隳圯我懷晉外臣孰似袁內史深慚盛時守無策正邦紀日暮仰北辰天寒一星紫尚想白登圍無言淚如水唐奎前題吳淞江上袁公壘千年何處尋遺趾石犀半落江水中秋老蘆花三十里五百馬塵今尚飛啾啾赤子將安歸月明古堞急鼓擊孤臣有淚空沾衣○黃浦在縣東海之喉吭也以黃歆故又名春申浦其源受杭州嘉興之水起自

秀州塘經華亭縣界又迤而東以入南北兩涯之水迨至南廣福寺則折而北趨於縣境我 洪武間吳淞江淤塞永樂元年浚江通海引流直接黃浦濶三十丈遂以浦名今橫濶二里許又折而東北合於江以入海前志云元至元大德間浦面濶盡一矢力泰定中建閘於旁近上流勢緩沙積兩湄遂成沙途居民因蒔葭葦淺狹過半○黃浦之西有龍華村相傳吳越錢鏐嘗夜泊浦上風雨驟至草莽間祥光燭天詢其地古龍華寺基也遂命大盈莊務張仁泰重建龍華教寺寺前有寶塔時時放光○鶴坡在縣東南六十里下沙鎮世傳陸機養鶴處又云其地產鶴俗呼鶴窠故下沙一名鶴沙沈括筆談云鶴惟鶴窠村產者爲佳他處雖有乃凡格也○石筍灘在鶴坂捍海塘外到海三十里每二三丈輒有石如筍植立沙中若是者彌望潮汐至此其流遂分本名分水港好事者易以今名○靜安寺初在滬濱孫吳赤烏中天竺康僧會於此創重玄寺勒碑紀事名赤烏碑陳朝植檜於殿墀左右唐陸龜蒙皮日休有重玄寺雙檜詩卽此宋祥符初改今額政和間朱勗畫雙檜圖進

上上遣中使取之欲毀山門以出一夕風雨雷震
其一而右者尚存嘉定九年僧仲依以寺逼近江
濱濤水衝涯因遷於蘆浦寺前中流數尺特深如
井晝夜騰沸而氣稍溫或指爲海眼名曰沸井濱
今泉在寺內而濱爲平陸矣仲依築土爲臺聚徒
講習名曰講經臺明周彌寺記云西晉建興元年
有兩石像浮於江浦吳縣人朱膺迎置重玄寺其
背有銘蓋七佛中之二一爲維衛一爲伽葉六年
漁人又獲兩石鉢於下沙稍觸鐘葦變怪輒見因
置於石像前爲供具宋時七月十五日村郭設會

寺僧盡赴唯留智儼一人也而胥村人來寺強之
同行至舟中見捕蝦者從買一斗索水噉之無遺
謂漁者曰齋回還汝錢登岸前行舟人播於衆及
至齋家因不得上座令席一飯而無襯錢還見漁
者索錢儼曰還汝蝦復索水飲隨吐活蝦盈斗還
之人因呼爲蝦子和尚及將示寂斂蒲草爲萬餘
繩懸于廊廡曰吾將作大緣事遂卽坐脫人競施
錢懸於繩皆滿因以建佛閣元時寺有綠雲洞乃
僧壽寧栖息之所趙子昂扁以是名楊鐵崖爲志
皮日休詠陳朝檜詩撲地徘徊是翠鈿碧絲籠細

不成烟耳根莫厭聽佳木一對後貌相枕眠陸龜
蒙和可憐烟刺是青螺如到雙林誤禮多更憶早
秋登北固海門蒼翠出晴波○塚宅記云上海北
亭鄉有高隴云是漢竿融墓其傍有竿墓涇○晉
左將軍袁崧墓在縣之長人鄉相傳崧旣被害其
部下李祥收骸骨葬之于此○雲錦樓在縣治北
下瞰蓮池相傳費雄夏月飲宴于此○周浦鎮一
名杜浦在十七保宋詩人儲泳家焉○南村草堂
在泗涇北陶九成宗儀畊讀之所宗儀著有南村
輟畊錄

青浦縣

在府城西
北四十里

上海稱黃浦而此地近海其色青故曰青浦蓋吳
淞江水自上海之黃浦經嘉定江灣入縣界東北
流注于海名曰東江 國朝嘉靖二十二年巡按
御史舒汀奏立此縣割華亭西北二鄉上海西三
鄉隸之三十二年給事中朱某議廢青浦所割復
故萬曆元年用郡人蔡汝賢議復設移治唐行鎮
勅建于知縣石繼芳越五年甬東屠隆爲令大興
釐革禮賢好士民俗以章所著有由拳集若干卷
○志云古岡身有三曰沙岡曰竹岡曰紫岡皆在


縣界南屬於海北抵松江長百里人土數尺皆螺蚌殼世傳海上湧浪而成其地高阜宜菽麥吳郡圖經云瀕海之地岡阜相屬謂之岡身貝闕過竹岡詩迢迢竹岡路村墟烟火遲地從滄海盡天入大荒垂網集知潮落舟行覺岸移平生貪勝槩隨處一題詩○舊青龍鎮寺前有沈光碑宋宣德郎呂益柔爲妙悟太師譔其略云師諱希最治平中居鎮之隆平塔院道俗咸嚮久之移居於此講說如初寺僧子雲之室夙有祟師呪塊土擲其室中須臾得片紙書曰今被法來遣難捨法力沒當復

來於是寧息者累日其後擊物颺火變怪大作子雲惶怖復請師禳之師至怪所訶之曰汝果何物得非未離幽壤之苦將乞慧力以求生耶何爲擾人不已汝不聞惱法師者頭破七分乎因爲之講說輪迴因緣仍令衆僧聲呪以破其罪障俄而空中轟然有聲得朱書數十字自稱有漢烈士沈光大端皆悔過謝罪之語且云自蒙懺解已生他化天矣○輟畊錄云莊蓼塘家于青龍鎮嘗爲宋秘書小史其家蓄書數萬卷且多手抄者經史子集山經地志醫卜方伎稗官小說靡所不具書目以

甲乙分十門後至正六年朝廷開局修宋遼金三
史詔求遺書有獻者予一官江南藏書多止三家
莊其一也○南村又云江浙行省員外郎楊乘字
文載濱州人至正後杭州陷公被黜退居青龍鎮
十六年淮人陷松江秋七月遣所署官吳縣丞張
經等齎禮幣造請公曰吾廢處田里久不足以辱
使者吾當擇日受命請以幣置里門外經等如其
言公命子鹵卓具牲醴告祖禰既竣事復命酒飲
及暮行後園中顧西日晴好慨然曰晚節如是足
矣命鹵等治畦處置家事如平日夜分就寢乃自

經于室○黃道婆祠 明張之象記略云黃道婆
烏泥涇鎮人也初淪落崖州元元貞間附海舶歸
閩廣多種木棉織紡爲布名曰吉貝而道婆最善
是業先此涇鎮土壤瘠民多貧困遂覓木棉種
於閩廣樹藝其地然尚無踏車椎弓之制率用手
劈去子棉絃竹弧置案間振掉成劑其功甚難道
婆乃教以制造捍彈紡織之具至於錯紗配色綜
綫挈花又各有法故被褥幌帶之類織以折枝團
鳳碁局文字燦然若寫工人競相倣習售於他方
遂致饒裕未幾道婆卒莫不感恩立祠歲時享之

林江府志卷之十一



程